



Aqqalu C. Jerimiassen

UKA 2025/139-1

Atassut

23. Oktober 2025

Partiit nunanit allanit tapiissutininik tapiissuteqartunik pissarsiaqarsinnaatitaannginnermut aamma partiit nunatta avataani najugaqartut angerlarsimaffeqartulluunniit Qallunaat Nunaanneersut Savalimmiuneersullu inerteqqummut ilanngunneqarnissaat pillugu Inatsisartut inatsisaat nr. 14, 4. februar 2025, § 4b allanngortinneqarnissaanut Naalakkersuisut inatsimmut allannguutissamik suliaqaqqullugit Inatsisartut aalajangiiffigisassaattut siunnersuut. Siunnersuut kingusinnerpaamik UKA2026-mi saqqummiunneqassaaq.

(Inatsisartunut ilaasortaq, Pele Broberg, Naleraq)

Partiit taperneqartarneri nunatta karsiaaniit ukiut tamaasa piusarteq nalinginnaasutut tamatta partiisugut aningaasaqarnitsigut sulisoqarnitsigullu isumalluutigaarput.

Partiillu maanna pisoqaanerusut pingasuusugut, oqaannaraanni inunnguutsitinnik Danmarkimi Savalimmiunilu partiinik "qatannguteqarpugut", maanna partiit nutaanerusut akerliuniarluni pilersinneqarsimasut nalinginnaasumik periuserinngisaanut.

Atassummiillu isertuutinnngisaannarparput Danmarkimi Venstre suleqatigaarput, Savalimmiunilu Sambandsflokkurin, taakkunanilu partiit pingasuulluta naapeqatigiittarnitsigut naalagaaffeqatigiit iluanni ikinngutigiiinnerput takutillugu oqaloqatigiittarluta, partiip siunnersuuteqartup tamanna tassa nuannarinngilluinarunagaat.

Nunatta avataaniit taperneqartarneq soorunami aqqiivigineqarpoq inatsisitigut, nunarput USA-mit pisiarineqarniarsarillarmat, USA-p præsidentiata Donald Trump-ip isertuanngivilluni nunarput tigorussullugu oqariartortaqaattaalermat pimoorutivillugu.

Arlaliunikuugunaraluarput talerperlerniittut ingasammik, USA-mi Republican party-mut qaninnerusumik isumaqarnikuugaluit, uumminnga siunnersuuteqartut partiata qalipaataata assiganik nujallip ingasaassiniatut pissuseqalernissaa tikillugu.

Taassumallu pissutissaqalersippaatigut nunatsinni immitsinnut illersorsinnaasariaqartugut, tupinnanngitsumillu qinigaaffik kingulleq naaqqinnaartorlu tassa naalakkersuisut siulittaasorisimasaata piaartumik inatsimmik atuutitsilernissaaq qaqqippaa, ullup ataatsip iluani pingasoriarlugu taasissutigipallanneqartumik. Qujanavissorporlumi taanna, USA-miimmi imaaginnalivikkamik sunniiniarnermik siunertaqartumik pilersut, allaat takussaalerlutik aqqusinnermi aningaasanik agguuasut.

Partiitoqaanerusut Danmarkimi partiinit "qatanngutiminniit" taperneqartarnerat siornatigut nalinginnaavissornikuugaluarpoq, maannali tassaaneruliinnarsimalluni suleqatigiinnikkut isumassarsioqatigiilluni oqaloqatigiittarfiit.



Uagullumi partiit minnerit qinersinermi kingullermi avataaniit sunnerneqarata nalinginnaasumik agguaattakkanik qinersisartunut naammattusaaqaluta sinerissami pivugut, partiinut annernut, ingammillu uuminnga qulequttamik siunnersuuteqartunut unammillersinnaanngilluinnarluta.

Eqqarsaammernanngitsuunngilarlumi, partii maanna siunnersuuteqartuusoq uuminnga, kisiartaalluni qiningaaffik kingulleq imm.165-imut taaseqataanngimmat, maannalu tassa suna tamaat sakkungalugu kunneqarfiulluunniit iluani suleqateqarnissaq mattukkusummagu.

Sooq suli Danmarkimut qanittumik suleqateqartarnitsinni taamarsuaq killilersuiniarsarissuugut, oqaannarlutaasiit "nunap inui" pillugit, oqippallaaleqaaq taanna oqartarneq, immaqalu allaat imannak misinnarsilluni, naleqqamut apeqqusiineq tassaasoq kalaallinut tamanut apeqqusiineq, suulluunniimi maanna tamaasa siunnersuutigineqartup partiimit tassannga apeqqusilaaraanni tassa kalaallinik illersuinngitsutut taaneqartarneq nalinginnaasunngorpallaalerpoq.

Sulilu maanna folketingimut ilaasortaataqartartillugu nunatsinni partiiniit, taamatullu maanna partii una imannak siunnersuuteqartoq Siumumiit pissigarnernik folketingimi ilaasortaataqarluni, qanoq taava aningaasatigut taperneqartarnissarmita tassani eqqarsaatigilerpaat.

Taamaattumik Atassummiit una siunnersuut itigartinneqassasoq innersuupparput.